

Aisciuda Ladina 2012: fèr sport col cher ladin

Dai 3 ai 5 de mé vegn endrezà la quarta edizion de la scomenzadiva che lea adum ogne setor de la sozietà fascèna

L'é temp d'Aisciuda, ma più avisa l'é temp de l'Aisciuda Ladina! La é ruèda a sia quarta edizion la scomenzadiva che per 3 dis, dai 3 ai 5 de mé del 2012, lea adum enc, istituzions, mond cultural e economiche e chest an ence l mond sportif.

"Esser ladins tel cher, tel fèr, tel viver da vigni di. Corer, jir coi schi, sgolèr... ti bosc e sun nesc monc. Sentir la fadia jan envers l zil, sul piz de chela mont che da la val se veit su tant bel, tant dalonc, tant misterious. Se alenèr a la fadia, a na garejèda, col fià che doventa semper più fon, più fort. Fèr fadia per arjonjer chel travert con

arcedament ogne di, con costanza e con gust. Se vardèr dintorn endèna che se vif chesta fadia... Portèr l'inom e i colores de na squadra, chel inom ladin su la mondura che mingol conta de chel nosc esser ladins tel cher e tel corp, te la fadia. E ge insegnèr dut chest a nesc fies, a chisc joegn che vegn dō, e che à l derit de saer e de cognoscer la val, sia istoria, sie teritorie e sie lengaz. Leges e finanziaemenc ge dèsc l met a Fascia de stravardèr sia identitè, ma Fascia é chiamèda a defener e stravardèr chest melaur ruà ca da nesc veies, e che à da esser simbol de na realtà moderna e aldō di tempes."

L'é chisc i messajes che à volù dèr fora l Comun general dessema co la Scola, co l'Istitut cultural ladin "majon di fascegn", co l'Union di ladins de Fascia, apede a duc i protagonisc de la desvaliva edizions passèdes de l'Aisciuda Ladina: Joegn hotelieres, Sociazion artejegn e picola firmes de Fascia, Cheghes de Fascia e boteighes. L messaje che l'identitè ladina la podarà arjonjer sia forma più piena, demò se apede al lengaz e a la cultura, l'é ence chi setores economics e sozièi che à caraterisà Fascia tel doventèr na val rica e cognosciuda a nivel mondial.

L'obietif de l'Aisciuda ladina l'é chel de tor ite, te la scomenzadives e te la reflescion sun nosc esser ladins, ogne setor de la sozietà fascèna: l'é stat la scola, l turism, l'economia e chest an l'é apontin l'outa del sport. L sport desche leam sozièl olache da spes, a na vida scempia vegn fora nosc esser ladins, con pecia paroles ma con n spirit gaert e sciantif. La protagonistes de chesta Aisciuda, donca, sarà la sociazions sportives che, dessema al Comun general, les é envièdes a spartir chest derit

L'Aisciuda Ladina sun TML

En ocajon de l'Aisciuda Ladina 2012, sun TML (Televizion de la Mendranzes Linguistiches) se podarà veder desvalives programes dedichè al sport te noscia val: "Il battito del silenzio": video de la Scola ladina de Fascia premià al Filmfestival della montagna.

Sportament: lingua, sport e identitè. Comun general de Fascia 2011.

Via Battisti-Weiss sun Spiz da le Roe de Ciampié. (Fassa Climbing, Ciamorces, Comun general).

Tornoi de hockey de la valèdes ladines di 19 de oril te stadie Gianmario Scola.


Hockey Fassa: n an de pascion. Under 10-12

La scomenzadives de l'Aisciuda Ladina 2012 vegnarà dates fora per TML dai 14 de mé inant.

Fornesc sù tia vedrina

Fossa dassen bel che via per i dis de l'Aisciuda Ladina se posse veder endodanef la vedrines de la boteighes fascènes de duta la val fornides sù coi simboi ladins. Chest an l'Aisciuda Ladina é dedichèda al sport e donca a maor rejon la vedrines de la boteighes de

sport é envièdes a palesèr sia identitè. Ma chuc chi che à piajer de fornir sù sia vedrina ladina pel passèr te senta de l'Union di Ladins a Sèn Jan a se tor la bandiera e la tabela de l'Aisciuda Ladina che se pel ciapèr per nia. Ve speton donca e ...fornì sù voscia vedrina!



Program

En jiera ai 3 de mé te Chino Marmoleda de Cianacei

da les 19.30: aur la IV edizion de l'Aisciuda Ladina co na viva e buffet ladin. Vegnarà moscià i lurieres de l'Aisciuda ladines di egn passè e prejentà i carnières e l papièr da pach per la boteighes de Fascia e la scafa di libes per i sozi del Ladinhotel. da les 20.30: salut de l'autoritèdes e festa di atlec. Cristian Deville, Stefano Gross, Chiara Costazze e Cristian Zorzi farà doi cicoles col public; l sport de la femenes fascènes; prejentazion di "Azzurri" i atlec fascegn che ti egn à jià te la nazione e che à arjont resultac a nivel internazionèl.

Prejentazion del program de l'Aisciuda ladina.

da les 21.30: "Elges - lengac desvalives" de la sociazion Lengaz, spettacol de musega e

teater con Loretta Florian (ousc), Angela Deflorian col Zenter de bal de Tieser (bal) e Paolo Bernard (piano). Test de Alberta Rossi e musega de Ilario DeFrancesco.

En vender ai 4 de mé a Vich e Poza

da les 9.00 sul ciamp de balon de Cotura: "Sbalonèda fascèna", tornoi de balon di bec de la scoles populères;

da les 20.00 te Sorastanza de la Scola Ladina: conferenza de la psicoterapeuta Sarah Vian su "La psicologia del sport: agonism, divertiment e madurazion psicofisica". Premiazion del joegn atlet fascian e consegna del gadget a la sociazions sportives.

En sabela ai 5 de mé a Ciampedel

da les 9.30 jun Ischia: "Fascia che cor", garejèda de corsa a pe per duc i scoles de la scola mesènes

per endrez de la Scola ladina de Fascia e de la sociazion Atletica Fassa 2008;

da les 12.30 marena a l'averta co la colaborazion di hotelieres de Fascia (per nia per i atlec che tol pèrt a la scomenzadives del domesdi e 5 euro per duc i etres);

da les 15.00 "Sport e Spas" jèghes a squadres anter sport e cultura.

da les 16.30 prejentazion de la squadra ladina a Europeada e consegna di gadgets;

da les 17.00 desmostrazion e spettacol de sgol col parapent de la sociazion Ikarus flying club.

Chest e n muie de auter ve speta a l'Aisciuda ladina 2012. Maor informazions alo da l'ofize linguistich del Comun general de Fascia o chiaman l 0462 764500. Siede duc enviè, perchè fèr sport fèsc ben, l fèr per ladin fèsc miec.

Litazions del joen atlet fascian

Lità l joen atlet fascian! Via per i dis de l'Aisciuda Ladina l'é l met de litèr l joen atlet fascian. Chesta litazion perveit che duc chi che tolarà pèrt a la scomenzadives de l'Aisciuda Ladina, tant desche protagonisc che desche public, i lite apontin l'atlet che ge piès de più duran la zedola che se troa ti volantins col program che é stac portè fora

te duta la val.

La sozietèdes de sport de Fascia che à tout pèrt a l'endrez de l'Aisciuda Ladina les à dat ite i inomes de si atlec miores sot i 16 egn, chi che se troa apontin ti volantins. Ma ben segur se pel litèr ence n auter atlet che no é te chesta lingia, bèsta che sie n sportif fascian de manco che 16 egn. Te la zedola l'é da scriver sù

inom de l'atlet e la sozietà sportiva o l sport pratèga.

Ti dis de l'Aisciuda vegnarà metù fora na urna te la sentes de la scomenzadives olache vegnarà tout sù la preferenzes. Siede duc enviè a litèr l joen atlet fascian. Amisc, sostegnidores, parents, compagnes de jech, lità e tolè pèrt a l'Aisciuda Ladina!

